

“Newaya Mitribê Çengê”

Azad ZAL
azadzal@hotmail.com

PEŞNÛMA

1- Pênas û vegotina têgîna Qesîdeyê

a- Qesîde

i- Pênasa Qesîdeyê

ii- Teşeyê Wêjeyî yê Qesîdeyê

iii- Beşên Qesîdeyê

iv- Binavkirina Qesîdeyê

v- Di dîwanan de rêzîkirina qesîdeyan

b- Musemmet / Qesîdeyên Musemmet

c- Ted(z)mîn (dat)

2- Di qesîdeyê de hesabê ebcêdê

3- Pîvan û rêzbendîya qesîdeyê

4- Li gorî destnivîs û çavkaniyên di destê me de metna qesîdeyê

5- Bikaranîna Nav (Mexles) û li nava rêzên qesîdeyê danîna dirokê

a- Bikaranîna Mexlesê

b- Di Qesîdeyê de Hesabê Ebcêdê

6- Çavkaniyên ku me serî li wan daye

1- Pênas û vegotina têgîna QESÎDEYÊ

a- Qesîde:

i- Pênasa Qesîdeyê: Qesîde peyvek bi erebî ye. Ji “QESEDE”ya Erebi tê. Tê wateya “niyet li tiştekî/ê anîn; bi zanîn baldayîn û kirina kiryariyekî; nêzikbûn û xwesteka li ser tiştekî/î” ye. Li gorî têgihîştina tasawufê ji bo ku bala evînê (eva ku jê tê hezkirin) bê kişandin û li gorî xwestek û pêdiviyên evînê bêne cih; dilê evînê xweş bibe xwe-parastina ji her tiştî û xwe vekişandina viyanî ya ji her tiştî ye. Qesîde li ser wê wateyê diriste.

Helbest û honandinên wêjeyî yên ku ji bo evînê (*di tasawufê de Evîna Xweda*) hatine gotin û nivisandin qesîde ne. Ev ji aliyê batinî ango tasawufî ve pesindayîna **Evîna Xwedê** û ji wê gazin û giliyan kirin e.

Ji aliyê zahirî ango jiyana pergala civakî ve qesîde ji bo pesindayîna yekê û li ser wê standina pere ye. Qesîdeyên bi vî rengî ji bo serdar û pêşevan û padişah û mîrên demê re têne nivisandin.

ii- Teşeyê Wêjeyî yê Qesîdeyê: Ji aliyê teşeyî ve di navbera 9 û 100 malikî (beyt) de qesîde têne nivisandin. Pîvan û qalibê qesîdeyê wekî aa/ba/ca/da..... ye. Ji malika (beyt) pêşî re **metle**’ tê gotin. Malika pêşîn her du rêz bi hev re bi aheng in. Ango aa’ye. Malika piştî wê malikê **husn-u metle**’ e. Ji malika paşîn ya Qesîdeyê re **meqte**’ tê gotin. Ji malika berê ya **meqte**’ê re **husn-meqte**’ tê gotin.

Helbestvan dema qesîdeya xwe dinivîsîne li ser hinek tiştan bêtir baldar e û bal dikişîne ser hin xalên girîng. Li gorî wê **husn-u metle**’ ji **metle**’ê, **husn-u meqte**’ ji **meqte**’ê xweştir e. Ji malika herî xweş ya qesîdeyê re **tacbeyt** ya ji **sermalik** tê gotin. Helbestvan piranî di malika **meqte**’ê de navê xwe bi kar tîne. Lê dibe ku di malikên beriya malika **meqte**’ê de jî bi kar bîne. Her wiha helbestvan pirê caran di malikên ku du’ayan dike de navê xwe tîne zimên.

Pirên helbestvanan bernav bi kar tînin. Dema helbestê dinivîsinin ango destpêka helbesta xwe bi bikaranîna bernav nîşan didin.

iii- Beşên Qesîdeyê: Qesîde li gorî mijara xwe li ser 4 beşan ji hev tê veqetandin.

Nesîb ya jî Teşbîb (Destpêk): Ku mijara Qesîdeyê evîn be destpêk bi navê **nesîb** tê gotin. Lê ku mijar cuda be û cur be cur be **teşbîb** tê gotin. Destpêkên qesîdeyê li gorî mijarên xwe hatine binavkirin: Ku mijar demsala biharê be; Bahariye, ku zivistan be Şittaiyye û her wiha Temuziyye, Îdiyye, Sûriye têne binavkirin. Qesîde bi xwe jî ji ber van mijaran û beşa **nesîbê** hatine binavkirin.

Hinek helbestvan bê beşa nesîb helbestê dinivisîn.

Medhiyye (Pesin): Piştî beşa nesîbê helbestvan bi malikekê derbasê beşa din ango mijara eslî dibe. Ji vê malikê re **gurizgah** tê gotin. Bi wateya ciyê revê tê bikaranîn. Ji vê beşa ku bi gurizgahê têketin dibe re **meqsed** ya jî **maqsûd** ya jî **medhiyye (pesin)** tê gotin. Di vê beşê de helbestvan yê ku lê **medhan** dike -ku **memdûh** e pesnan dide. Li ser wêfên wî/wê disekine. Li ser camêrî, merdîfî û edalet û hwd. yên wî/wê pesnan dide.

Fexriyye (Xwepesindan): Piştî vê beşê jî derbasî **fexriyyeyê (xwepesindan)** dibe. Di vê beşê de helbestvan behsa xwe dike. Wesfê xwe û helbestvaniya xwe dide. Helbesta xwe diwesfîne û gazinan dike ku kes qîmetê nadê.

Du'a (Niyaz): Di dawiyê de dikeve beşa **du'ayê**. Ji bo ku Xwedê temenekê dirêj bide memdûh du'ayan dike. Di vê beşê de behsa belengazî û feqîriya xwe jî dike ku alîkarî ji bo wî bê kirin. Di vê beşê de **mexlesa** xwe ango navê xwe tîne zimên. Wekî ku me li jorê jî gotibû; ji malika ku helbestvan navê xwe tîne ziman re **tacbeyt** (ya jî **sermalik**) tê gotin.

iv- Binavkirina Qesîdeyê: Qesîde bi xwe ji ber mijara beşa **nesîbê** hatine binavkirin. Mijara nesîbê li ser çi be navê qesîdeyê bi wî awayî ye. Wekî mînak: Bahariye, şittaiyye û hwd. Dîsa Qesîde li gorî redîfa wan jî hatine binavkirin. Wekî mînak: ku di qesîdeyê de redîf ango peyva ku malikan bi hev ve girê bide çi be li gorî wê tê binavkirin. Qesîdeya Avê, Qesîdeya Baranê hwd. Yên ku bê rêdîf bin, li gorî dengê (tîpa) kafiyyeyê têne binavkirin. Mîmiyye, Qafiyye û hwd.

Dîsa Qesîde li gorî mijarên xwe bi awayê din jî têne binavkirin. Yên ku behsa Yekîtiya Xwedê bikin ji wan re **tewhîd** tê gotin. Yên ku e'fûyê ji xwedê bixwaze û xwe bavêje dergah û dîwana Xwedê ji wan re **munaca't** tê gotin. Yên ku li ser Hz. Muhammed û Her Çar Xelîfeyan bêne nivisandin ji wan re **na't** tê gotin. Yên ku li ser Padişah û Wezîr û Mezinên Dewletê bêne nivisandin ji wan re **methiyye** tê gotin.

Qesîdeyên methiyyeyê jî li gorî memdûhan têne binavkirin. Yên ku ji bo destpêkirina padişahî ya jî mîrîtiya mezinan bêne nivisandin ji wan re **culusiyye** tê gotin. Yên ku li ser yekê/î bi nexweşî bêne nivisandin û rexne bêne kirin ji wan re **hîcwiyye** tê gotin. Hinek jî li ser dîrokê yên ku pesnên wan têne dayîn têne nivisadin. Ji wan re jî **qesîdeyên dîrokê** tê gotin.

v- Di dîwanan de rêzkirina qesîdeyan: Di dîwanan de qesîde li gorî mijarên xwe li dû hev têne rêzandin. Pêşî tewhîd, şûn de munacad, şûn de na't şûn de methiye, culusiyye tê. Di hinek dîwanan de hîcwiyye jî heye.

b- Musemmet / Qesîdeyên Musemmet:

Wekî têgînên din yên wêjeyî musemmet jî bingeha xwe ji erebî digire. Ji peyva **smt (sîn, mîm, ttê)** tê der. Wateya bingeîn ya peyva **musemmetê** bend (ta, ben) ya jî gerdana ku morî û mircan lê têne rêzkin e. Wateya wêjeyî jî li ser vê yekê derketiye meydanê.

Qesîde ya jî xezelên ku xwedî ahenga hundirîn bin jî ji wan re qesîdeya (ya jî xezela) musemmet tê gotin. Dîsa di dîwanan de helbestên ku ji bendan ango ji du rêzikan zêdetir bêne der re musemmet tê gotin.

Pîvana arûzî ya musemmetê piranî li ser du awayan e.

Yek jê *mefailun mefailun mefailun mefailun e*

Ya din jî *mustefilun mustefilun mustefilun mustefilun e.*

Li gorî van pîvanan malik di nîvî de xwedî aheng e. Ku qesîde ya jî xezel li ser beytan ava bûbe dibe ku çarîn; ku li ser bendan ava bûbe dibe ku bibe musemmen (heştîn).

c- Ted(z)mîn (dat): Hunerek wejeyî ye. Helbestvan dema ku rêzekê ya jî beytekê ji helbestvanekî din bigire û di helbesta xwe de bi kar bîne ew **ted(z)mîn** dike. Lê divê ku navê xwediyê helbestê bîne ziman û diyar bike. Ku navê xwediyê helbestê jî aliyê her kesê ve bê zanîn dibe ku diyar neke jî. Ted(z)mînkirin piranî li ser helbestên ku ustad têne dîtin tê kirin. Helbestvan dikare helbesta kesê ku ji bo xwe ustad dibîne ted(z)mîn bike.

2- Di Qesîdeyê de Hesabê Ebcedê

Di navbera tîp (herf) û hejmaran (reqem) de ji berê de têkiliyekê hebûye. Ev wekî tiştek pîroz hatiye dîtin. Ji dema Babilê, Hinda Kevn û Yewnanan ve ev têkilî hatiye danîn û di wêjeyê de wekî *razeke (sir) xwedanî* ji aliyê wêjevan û destanbêjan ve hatiye bikaranîn. Di nivisbariyê de wekî **Pergala Hesabê Ebcedê** hatiye binavkirin û hatiye bikaranîn. Jê re **Hesabê Cemel** jî tê gotin.

Pergala Hesabê Ebcedê; li gorî alfabeya aramî her tîpek bi barek

reqemî tê nixandîn. Ev jî li ser 8 peyvên ku niha wateya wan nayê zanîn ya jî bîngeha xwe ji ku digirin salix ji wan nayê dayin tê der. Ev peyv ango nav *ebced, hewwez, hutî, kelemen, se'fes, qereşet, sexîz, dazuxîlen* in. Ev peyv rêzkirina li dû hev ya alfabeyê ye. Lê ne ya alfabeya erebî ya îroyîn e.

Li gori hinek rîwayetan tê gotin ku li welatê Medyen 6 qral hebûne. **Ebcad, Hewwez, Hutî, Kelemen, Se'fes, Qereşet** her yek navê qralekî bûye. Serdarê van qralan jî **Kelemen** bûye. Piştî ku qewmê Şue'yîb diçe helakê ev qral tev têk diçin. Nav (yan jî peyvên) **Sexîz û Dazuxîlen** jî şûn de li wan hatine zêdekirin. Li gorî hinek rîwayetên din jî tê gotin ku ev nav navên Şeytan in. Hinek rîwayet jî dibêjin ku ev navên rojên hefteyê ne.

Bi çî awayî be ev nav wekî **Ebcad** tê zanîn û alfabeya aramî ye. Li gorî wê her tîpek reqemekê diderbirîne. Hê jî di rêzkirina mijaran de dema ku tîpên alfabeya erebî (aramî) tene danîn li gorî vê rêzkirinê ne. Wekî mînak; li gorî ا, ب, ج, ث, ت, nayên rêzkirin; ا, ب, ج, د, tene rêzkirin.

Di wêjeya klasîk de bi taybetî ev hesabê ebcadê (cemel) ji bo bûyer, bûyîn, mirin, daketin û rabûnan di helbestan de wekî hunerekê wêjeyî hatiye bikaranîn. Hozanvan û helbestvanên ku bi kar ne anî be tune ye.

3- Pîvana û Rêzbendîya Qesîdeyê

Navê Qesîdeyê:

Newaya Mutribê Çengê

Tewrê Qesîdeyê:

Tewhîd (Evîna Xwedê)

Navê Pîvana Qesîdeyê:

Behra Hezec a Salima Musemmen

Pîvana Qesîdeyê ya Arûzî:

mefailun mefailun / mefailun mefailun

Pîvana Qesîdeyê ya Kîteyî:

16 (8+8)

Pîvana Qesîdeyê ya Îşarkî:

. _ _ _ . _ _ _ / . _ _ _ . _ _ _

Rêzbenda Qesîdeyê:

kafiye li ser 4 rêzan e. Her wiha; a x b/c c x b/d d x b...

Barê Pîvana Qesîdeyê:

Ne-wa-ya mut-ri bê çen-gê fi-xan a-vê-te xer-çen-gê

We-re sa-qî he-ta ken-gê ne şû-yîn dil ji wê zen-gê

Pîvana Li ser:

Me-fa-î-lun me-fa-î-lun me-fa-î-lun me-fa-î-lun

4- Li gorî destnivîs û çavkaniyên di destê me de metna qesîdeyê

Li gorî van agahiyan ku em werin ser **Qesîdeya Musemmet ya Melayê Cizîrî** em ê van pirsan ji xwe bikin: 1) Ji dema ku Mela gotiye/nivisandiye heta niha guhertin çêbûne yan na? Ku çêbûbin bi çî awayî çêbûne? 2) Mela çima Qesîdeya Musemmet ya bibend bi kar aniye? Di vê qesîdeyê de huner û felsefeya xwe daye ber kîjan hozanvanî? Vê danberheviyê bi çî awayî û bi kîjan mexsedî bi kar aniye? 3) Mela mexlesa xwe li ser kîjan navî û bi çî awayî bi kar aniye? Di vê qesîdeya xwe ya ku wekî destpêka diwanê tê zanîn de dem-diyarkirin bi hesabê ebcadê di kîjan malikê/bendê de û bi çî awayî bi cih kiriye?

5- Bikaranîna Nav (Mexles) û li nava rêzên qesîdeyê danîna dîrokê (Hesabê Ebcedê):

a- Bikaranîna Mexlesê: Mela mexlesa xwe li ser gelek nava û bi çi awayê hunerî bi kar anîye.

Melayê Cizîrî di **Dîwana** xwe de gelek nava bi kar anîye. Ev navên ku bi kar anîye ya wesfê wî, ya li gorî têgihîştina xwe ya tasawufî binavkirinên ku wî li xwe daniye û ya jî navê xwe yê ku tê zanîn bi kar anîye.

Melayê Cizîrî di **Dîwana** xwe de herî zêde mexlesa **MELA** bi kar anîye. Li dû wê **MELÊ** bi kar anîye. Di **Dîwanê** de **NÎŞANÎ** û **EHMED** jî bi kar anîye.

Di **Dîwanê** de: Wekî mexles 76 car **Mela**, 38 car **Melê**, 8 car **Nîşanî**, 6 car **Ehmed** bi kar hatiye. Ji vê tê derxistin ku Melayê Cizîrî bi navê xwe yê **Mela** hatiye naskirin û wî jî wisa xwestiye. **Melê** jî tewandina heman navî ye. Ji ber vê mirov kare **Melê** jî wekî Mela bihesibîne. Mexlesa **Nîşanî** mirov di **dîwanê** de tê derdixîne ku di navbera xwe û evîna xwe de (Evîna Xwedê) wekî navek taybet bi kar anîye. **Ehmed** jî li gorî çavkaniyên ku tînin ziman û di **dîwanê** de tiştê ku li ser **Ehmed** bal dikişîne navê wî yê eslî ye.

Melayê Cizîrî di vê Qesîdeya xwe ya Musemmet ya bi navê Newaya Mutribê Çengê de mexles wekî **MELA** di çarîna dawîn rêzika pêşî û serê heştikêta duyem de bi kar anîye.

*Ji Hafîz Qutbê Şîrazê **MELA** fehm er bikî razê
Bi awazê ney û sazê bibê ber çerxê perwazê
Tuzed min hubbîhes-sefwa bîhî ehlul-hewa neşwa
Meta ma telqe men tehwa de'id-dunya we ehmilha*

b- Di Qesîdeyê de Hesabê Ebcedê: Li gorî hinek lêkolîneran; Melayê Cizîrî di vê qesîdeya xwe ya ku wekî destpêka **dîwanê** tê zanîn de dem-diyarkirin bi Hesabê Ebcedê di çarîna şeşan de û bi awayek veşartî bi cih kiriye.

Zeynelabidîn Zinar di pêşgotina **Dîwana** Melayê Cizîrî ya ku wî latînîze kiriye de ji bo malika ku Mela hesabê Ebcedê tê de bi kar anîye wiha dibêje:

*“Çaxê wergerandina **Dîwanê**, em li malika dozdeyan (çarîna 6'an) ya di beşa destpêkê de (Qesîdeya Destpêkê; Newaya Mutribê Çengê) ketim gumanê ku tê de tarîxek heye. Malik ev e:*

*Ji herfan mah û salê ma, ne hat der şîklê xalî ma
Kuca danendê halê ma, sibik baranê sahilha*

*Me vê malika li jor li gor hesabê Ebcedê pişkift. Lê ji ber ku **Dîwan** gelek caran hatiye çapkirin, béguman di bêjeyan de gelek guhartin çêbûne. Îcar ev “şîklê xalî” di hinek çapan de bi “şîklê falê” hatiye nivisandin. Lê di çapa **Dîwana Bexdadê** de bi “şîklê xalî” nivîsiye. Ev çap jî ya Muhemed Elî Ewnî ye. Me xwe bi vê piştrast kir û tarîxa jî dayikbûna mela ji bêjeya “herfan” û “xalî” derxist holê, ku dike 980. Îcar ev tarîx ya Hicrî be, beramberî ya Miladî dike 1570.”²¹*

Birêz Celalettin Yoyler li hember Zeynelabidîn Zinar wiha gotiye:

“...Lewre birêz Zeynelabidîn hejmara tîpên bêjeya (herfan û xal) bi hesabê ebcedê 980 derxistiye. Mixabin bêjeyên ku Zeynelabidîn Zinar bi hesabê ebcedê nîrxandiye ne beramberî 980 tîp, lê belê beramberî 970 tîp. Lewre wî “herfan û xal” bi hesabê ebcedê hejmartiye û gotiye: “Hejmar li ser hev beramberî 980'yî tîp. Em ê wan tîpên bêjeyan yek bi yek deynin ser rûpelê û binîrxînin: (H)8+(R)200+(F)80+(E ya A)1+(N)50+(X)600+ (E ya A)1+(L)30=970'ê koçî. (...) 970+622= 1561 mîladî. Hem jî xebitandina bêjeya “xal” di şûna “sal” de jî bi guman e. Lew re nusxeyên ku di destê me de hene, bi giştî “ji herfan mah û salê ma” hatine nivisandin....”²²

Rêzdar Nayîf Mikaîl Tahir di pirtûka bi navê “Şeyxul Cezerî, Nehcuhu ve ‘Eqîdetuhu Min Xîlal Dîwanihi El-Şî'rî” bi awayekî din hesabê ebcedê li ser heman rêzika Mela bi kar tîne. Wekî Zeynelabidîn zinar bi tenê du peyvyan nagire dest. Rêzê tev li gorî hesabê ebcedê dihesibîne. Wiha reng e:

Herfa=289, Mah=46, û(w)sal=97, ma=41, şîkl=350, fal=111, ma=41 bi tevahî=975 dike. Ev jî li gorî

*mîladî 1567 dike.” Di heman pirtûkî de Nayif Mikail Tahir li ser (HERFA) disekine û dibê ku “Elîf” a wê tune ye û li gorî wê **yek** (hejmara Elîfê 1 e) dikeve û dimîne 974. Her wiha dibê ku “herfa” wekî pirjimari bi kar baniyana wê bigotana “herfên”. Ji lew re dibe ku ew “a” anga “elîf” a wê tune ye.²³*

Ku Mela di vê rêzika ku li ser şîrove têne kirin û li hesabê ebcedê tê xistin de tarîxê danîbe sê çavkanî û lêkolînerên cuda cuda dibêjin û hesabê wan cuda der tê. Di vir de hawê ku Rêzdar Zeynelabidîn dibê Hicrî 980 be li gorî mîladî dike 1572. Bi çi awayî hesabê ebcedê bi kar aniye di pêşgotina pirtûka xwe de ne aniye ziman. Ku li gorî wî 980’yî hicrî be li gorî mîladî dike 1572 û 2 sal ferq dike. Dibe ku ji hicrî wergerandina mîladî de çewtî kiribe.

Rêzdar Celalettin Yoyler li ser hesabê Zinar çûye û lê di nava bêjeyan de tevlihevî kiriye. “Fali/ê û xalî” ya ku Zinar haniye nîqaşê “salî ma” tevli vê kiriye û bêtir li hev xistiye. Bi vî awayî Zinar pûç kiriye û li cihekî din li gorî hesabê ebcedê jiyana Mela hesab kiriye.

Her wiha Birêz N. Mikail Tahir jî rêzika ku Zeynelabidîn Zinar bi tenê “herfan” û “fal/xal” derxistiye tevekî bi hev re hesab kiriye û li “Elîf” a “herfa” aliqiyê û salekê kêmkê/zêde hesab kiriye.

*Ji vê zulmat û deryayê ji mewcan qet xeber nayê
Şikestî keştiya bayê ‘ucacê wê şefeq dayê
Ji herfan mah û salê ma ne hat der şiklê falê ma
Ku ca danendê halê ma sibik baranê sahilha*

6- Çavkaniyên ku me serî li wan daye:

Versiyonên Dîwana Melayê Cizîrî yên ku di destê me de ne û me daye ber hev ev in:

- 1- Dîwana Melayê Cizîrî, bê şîrove ye, Çapa Elî Feqqe Muhemmed Nûrî. Ev Dîwan li Metbe’e Dar-ul Kîtab-ul Erebi ya Misirê çap bûye.
- 2- Destnivîsa Dîwanê ya Muhemmed Sebriyê Lawê Mela Ebdulfettahê Herşenî ku di sala 1341 16’ê Temûzê de ji aliyê Herşenî bi xwe ve hatiye nivisandin.
- 3- Ehmedê Lawê Mela Muhemmedê Buhtî yê Zivingî ku di sala 1958-59’an de tevî şerha erebî wekî du cild hatiye çapkirin. Du çapên wê di destê me de ne. Yek jê Cilda yekemîn di sala 1958’an, cilda duyemîn di sala 1959’an de li “Tebe’e Fî Metbe’et-irRafidîn” li Qamişlû hatiye çapkirin. Ya din sala çapa wê û çapxaneyê wê ne diyar e. Ew jî wekî 2 cild hatiye çapkirin. Di sala 1984’an de Mele Mehemed Emînê Çawşelîkî vê çapê bi dest xistiye.
- 4- Şerha Dîwana Şeyxel Cezîrî, ya Mela Ebduselamê Lawê Murad el Cezîrî, di sala 2004’an de li Dihokê di nava Weşanên Spîrêz de hatiye çapkirin.
- 5- Dîwana Melayê Cizîrî, Zeynelabidîn Zinar, Firat Yayinlari, 1986
- 6- Şîroveya Dîwana Melayê Cizîrî; Celalettin Yoyler, Weşanên Enstîtuya Kurdî ya Stenbolê, Avrêl 2006
- 7- Melayê Cizîrî Divani’nin Şerhi, Abdulkumît Septioglu, Weşanên Nûbihar, 2005

Têbînî :

⁽¹⁾ Çavkaniyên ku Hesabê Ebcedê/Cemelê hatiye lêkolîn û piştrastkirin ev in:

- El-Muncid Fil-luxetî Wel-E’lam, Beşa Elîf Rûpel: 2 Çapa 13emîn, Lubnan-Beyrût, 1975
- Şeyxul Cizîrî Nehcuhu we E’qîdetuhu, Mîn Xilal Dîwanihil Şi’rî Rûpel: 29 – Naîf Mikail Tahir Duhok-2005
- Tasawuf Terimleri ve Deyimler Sözlüğü Rûpel: 178 – Prf. Dr. Ethem Cebecioglu
- Ferheng-i Farisî rûpel: 44 Dr. Mehmûd Mu’nî Tehran-1384 h.
- Gencine-i Guftar Ferhengî Ziya Cild 1 rûpel: 99 Ziya Şukûn MEB Istanbul - 1996

⁽²⁾ Di hemû çap û destnivîs û şîrove/şerhên ku Dîwana Melayê Cezîrî de (yên ku di destên me de ne) navê vê Qesîdeya Musemmet ya Mela wekî “Newaya Mutribê Çengê” derbas dibe. Lê bi tenê di nusxeyê ku ji aliyê Zeynel Abidîn Zinar ve hatiye latînzekirin û çapkirin de wekî nav “Sirê Meygêr” derbas dibe. Me li ser vê yekê navê qesîdeyê “Newaya Mutribê Çengê” diyardê dît. Em bawer in Mela jî navê wê heman tişt daniye.

⁽³⁾ **Behra Hezec** di wêjeya Kurdî ya klasîk de gelek caran hatiye bikaranîn. Di zimanê Erebi de tê wateya “strîna bi dengê xweş û bilind”. Di pîvana Erebi de behra 6’mîn e. Di pîvana Farisî de bi gelek awayan hatiye bikaranîn. Di Farisî de 28 qalib li ser vê behrê hatine bikaranîn. Her wiha 24 qalibên “rubai” (çarîn) li ser vê pîvanê hatine bikaranîn. Di wejeya klasîk ya Kurdî de nayê zanîn ku vê behrê bi çend qaliban hatiye bikaranîn.

Ehmedê Xanî di Nûbara Biçûkan de vê behrê bi navê Behra Hezec a Salim a Musemmen ku qalibê wê **mefa'îlun mefa'îlun mefa'îlun mefa'îlun** e di beşa Nûbarê ya 12'mîn de bi kar anî ye. Xanî wekî malik (beyût) vê bi kar anî ye. Di vê çarîna Melayê Cizîrî de jî ev behr û ev qalib hatiye bikaranîn. Li ser pîvana vê em vê pênasê tînin: "Behra Hezec" tê wateya "bi dengê xweş û bilind strîn"; "salim" tê wateya "xweş û baş û dilrehetî"; "musemmen" tê wateya "heştîn angî heştîkîyî". Behra Hezec a Salima Musemmen: Bi dengê bilind û xweş heşteheşt strandin e.

- (4) Di Şerha Dîwanê ya bi Erebi ya ku ji aliyê Ehmedê Lawê Mela Muhemmedê Zivingî ve hatiye nivisandin; Mele Ebdusselamê Cezîrî di şerha xwe de û çapa Feqî Muhemmed Nûrî de ev peyv wekî "mutrib û çengê" hatiye nivisandin. Lê di destnivîsa Muhemmed Sebriyê Lawê Mela Ebdulfettahê Herşenî de "mitribê cengê" hatiye nivisandin. Li gorî me jî ya Herşenî çêtir e. Hem ji bo pîvanê guncantir e û hem jî ji bo qedîneka rêzimanî guncantir e. Li gorî me Mela dema nivîsiye gotiye "mutribê çengê". Newa bi xwe ya mutrib e. Ew mutribê ku li çengê dide. Ango "Newaya mutribê çengê" rasttir e û bêtir li cih rûdinê. Lê di peyva "mutrib" de di heman çavkaniyê ya Seydayê Herşenî de wekî "mitrib" hatiye nivisandin. Li gorî me "mutrib" rasttir e. Me di malikê de wekî "mutrib" nivisand.
- Mutrib; peyvek bi Erebi ye. Ji lêkera Erebi ya bi navê TERIBE'yê tê. Ji bingeha TERIBE tê wateya wê "şênîk, yê/a ku xweşî û şadiyê dide der û dorê û xwezayê; ji karê wî kesî/ê re TERIBE, ji wî/ê re MUTRIB tê gotin. Di bingehe de ji tevger û lêdanê tê. Kesê ku li amûrekî/ê muzîkê bide jê re MUTRIB tê gotin. Her wiha kesê/a ku stranan bibêje jî mutrib e.
- Di nava Kurdan de mutrib wateyekê din jî girtiye. Kesên ku di nava gel de bigerin, li saz û tembûrê bidin û pê re stranan bibêjin; bi wî awayî debara xwe bikin hene. Ev wekî koçeran in. Bi koçerî dijîn. Wekî êlekî hene û li herêmên ku ji xwe re diyar kirine digerin. Li henek ciyan ji wan re Mitrib ya jî Mirtib tê gotin.
- Di wêjeya klasîk de û di tasawufê de wekî mey, şerab, saqî ew jî xwediyê wateyek taybet e. Di tasawufê de yê/a ku deriyê raza îlahî vedike, rastiye (heqîqetê) vedibêje, dilê mezin û arîfan durist dike û bi vî awayî dilan xweş bike, şewqê bigihîjîne û rûyan geş bike Mutrib e. Mirovê ku gihîjtî be ew Mutrib e.
- (5) Seydayê Herşenî di destnivîsa xwe de di dewsa "çengê" de "cengê" nivisandiye. Li gorî me ev ne rast e. Ya rast ew e ku wekî "çengê" hatiye bikaranîn. Çeng nave amûrekê muzîkê ye.
- (6) Xerçeng: bircekî ezmanî ye. Di feleknasiyê û di astrolojiyê de ji 12 bircan yek e. Birca Kêvjalê tê gotin.
- (7) Seydayê Herşenî di destnivîsa xwe de "wê" gotiye; lê di heman nivîsê de bi heman pênûs û hubrê li seriya "wê" "vê" jî daniye. Dibe ku lê emîn nebûye ji ber wê jî "vê" jî li ser daniye.
- (8) Seydayê Herşenî di heman destnivîsa xwe de di dewsa "jengê" de "zengê" nivisandiye. Niha li gelekî herêman ev peyv wekî "zengê" tê bikaranîn. Lê li gorî dîtina me ev peyv wê dema ku Melayê Cizîrî nivisandiye bi rengê "jengê" bûye. Li gorî bêjenasiyê di werara bejeyên Kurdî de dengê "j" û yê "z" diguherin hev. Ev jî nîşaneyê wê ye.
- (9) Ev rêzik bi tevayî Erebi ye. Wateya wê jî ev e: "Ela ya eyyuhes-saqî edir ke'sen wena wilha" (Ey meyger bigerîne qedehê, bigehîjîne min jî wê.) Ev rêzik bi tevahî ji Hafîzê Şîrazî hatiye wergirtin. Di vir de Melayê Cizîrî Ted(z)mîn kiriye. Ji Dîwana Hafîzê Şîrazî xezela wî ya pêşîn tedmîn kiriye û pê qesîdeya xwe ya musemmen honandiye.
- Di vir de tiştek balkêş heye. Melayê Cizîrî qesîdeya xwe ya serê Dîwana xwe bi hunera TED(Z)MÎNÊ daye ber xezela Hafîzê Şîrazî. Xezela Hafîzê Şîrazî bi tevahî ev e: Binêre li xezela Hafîzê Şîrazî ya bi navê "Ela ya eyyuhes-saqî edir ke'sen wena wilha".
- Perwîz Cîhanî li ser ted(z)mîna Melayê Cezîrî wiha nivisandiye: "...ne tenê ev helbesta dawî, belkû hemû helbestên ko di wê têhelkêşê da li kutaya bendan da hatine û hejmara wan heft nîvmalik in, di gel nîvmalika yekem ko dibe heşt nîvmalika, hemû jî yên Hafîzê Şîrazî ne. Ev helbesta yekem ya diwana Cîzîrî têhelkêş wate tezmîna yekimîn xezela Dîwana Hafîzê Şîrazî ye û ew jî nivetezmîneke ji diwana Yezîdê kurrê Muîaviye. ...Herwekî ko hate nivîsinê, Melayê Cizîrî yekimîn Xezela diwana Hafîzê Şîrazî tezmîn kiriye. Lê tezmîna Mela jî tezmînek

الا يا ايها الساقى ادر كاسا و ناولها

الا يا ايها الساقى ادر كاسا و ناولها
كه عشق آسان نمود اول ولى افتاد مشكلها

به بوى ناهى كاخر صبا زان طره بگشايد
ز تاب جعد مشكيش چه خون افتاد در دلها

مرادر منزل جانان چه امن عيش چون هر دم
جرس فرياد مىدارد كه بر بنديد محملها

به مى سجاده رنگين كن گرت پير مغان گويد
كه سالك بىخير نبود ز راه و رسم منزلها

شب تاريك و بيم موج و گردابى چنين هابل
كجا دانند حال ما سبكبازان ساحلها

همه كارم ز خود كامى به بدنامى كشيد آخر
نهان كى ماند آن رازى كز او سازند محفلها

حضورى گر همىخواهى از او غايب مشو حافظ
مى ما تلقى من تهوى دى الدنيا و اهلها

ى

Qesîdeya Hafîzê Şîrazî
(Ela ya Eyyuhes-Saqî Edir Ke'sen Wena Wilha)

- taybetî ye. Mela tenê malka yekem û hemû nîvmalikên duwem yên wê xezelê tezmîn kiriye. Wate ji bilî malika yekem, nîvmalkên yekem yên hemû malikan avêtîye û tenê li ser nîvmalikên duwem yên wê xezelê têhelkêş saz kiriye....” (Bnr:http://www.nefel.com/articles/article_detail.asp?RubricNr=2&ArticleNr=1594)
- *Wekî ku di xezela Hafîzê Şîrazî de xuya ye 7 malik (beyt) di vê xezelê de hene. Melayê Cizîrî di Tad(z)mîna xwe de rêza yekem ya xezela Hafîzê Şîrazî di çarîna xwe ya yekemîn wekî rêzika dawîn bi cih kiriye. Rêza malika yekem ya xezela Hafîz jî di çarîna xwe ya duyemîn de wekî rêzika dawîn bi cih kiriye. Ji wê bi şûn de her 6 malikên mayî yên xezela Hafîz rêzikên wan yên dawîn di her çarînên xwe de wekî rêzika dawîn bi cih kiriye. Û bi vî awayî qesîdeya xwe ya musemmet honandiye.*
- (10) *Ev çarîn bi tevayî di destnivîsa Seydayê Herşenî de bi vî rengî ye:*
- Newaya mutribê cengê fixan avête xercengê
Were saqî heta kengê ne şo dil ên ji wê(vê) zengê
Heyata dil meya baqî binoşîn da bi muştaqê
“Ela ya eyyuhes-saqî edir ke’sen wena wilha”*
- (11) *Seydayê Herşenî di destnivîsa xwe de evê çarînê bi vî rengî nivisandiye.*
- Ku katib dêmê cedwel ket / Şikesti xet muselsel ket
Ji yek herfan mufessel ket / Ki ye vê muşkilê hel ket
Dizanî rûd û ûd ewwil / Çi tavêtin surûd ewwil
Ki îşqê asan nimûd ewwil / Welê uftadê muşkilha*
- *Seydayê Herşenî di vê çarînê de di dewsa ‘kit’ de ‘ket’ bi kar aniye. Her wiha di dewsa ‘ewwel’ de ‘ewwil’ bikaraniye. Ev bikaranîn ji aliyê weznê ve zêde pîrsgirêk dernaxin. Ji aliyê devîkî ve hinek cudatî dertê holê. Her wiha di zimanê Erebi de peyv bi xwe hem nivîskî û hem jî di telefuzê de ‘ewwel’ e. Şeddeya erebî hatiye bikaranîn. Her du deng hev dixwun diguherin dengê bi tenê. Lê di bikaranîne Kurdî de ev ditewe. Di nava Kurdan de wekî peyvên bi vî rengî ev peyv jî wekî ‘ewwil’ bi kar tê. Seydayê Herşenî di vê de bilêvkirina Kurdî bikaraniye. Dîsa Seydayê Herşenî di rêza dawîn de gotiye “Ki îşqê...” lê dema rêz bi vî rengî bê gotin pîvan xira dibe. Li gorî me ev “Ki îşqê(i)...” nîn e, “Ki îşq...” e. Di ya Zeynelabidîn Zinar û Şîroveya Celalettin Yoyler de di latîniye kirinê de hinek şaşî hatine kirin. Zeynelabidîn Zinar û Celalettin Yoyler di vê çarînê de “ewwel” wekî “ewel” nivisandine. Ev jî rêzik ango mailkê ji pîvana arûzî dixîne. Dîsa Zeynelabidîn Zinar rêzika dawîn ya ku Mela ji Hafîz ted(z)mîn kiriye -ku bi farisî ye wekî “ke ‘îşq asan...” Celalettin Yoyler jî heman rêzikê wekî “kî eşq asan....” nivisandiye. Her du jî çewt in. Ya rasttir ew e ku li gorî telefûza farisî “kî ‘îşq asan nimûd ewwel...” ye.*
- (12) *Seydayê Herşenî di destnivîsa xwe de ev ê çarînê bi vî rengî nivisandiye:*
- Ji muhra wê şefeq se’dê Şîrîn le’lê şeker we’dê
Dinalim şubhetê re’dê Ecêb im lê (ji) vê ce’dê
Ki dil ra tabê her çêneş Bi kufrê mêbered dêneş
Zi tabê ce’dê muşkêneş Çi xûn uftadê der dilha*
- *Seydayê Herşenî di dewsa ‘mihra wê’ de ‘muhra wê’ nivisandiye. Li gorî me ‘muhr’ rasttir e ji ‘mihr’ê. Her çî qas ji aliyê pîvanê ve guhertinekê neke jî ji aliyê bilêvkirina kurdî de ‘muhr’ rasttir û çêtir e.*
- (13) *Di destnivîsa Seydayê Herşenî û şîroveya Mela Ebdusselamê Lawê Murad El Cezîrî ya ku li Dihokê di weşanên Spîrêz de di sala 2004’an de derketiye de wekî “tavê” hatiye nivisandin. Lê di çapa Feqî Nûrî ya Misrê de, di şerha Zivingî û ya Celalettin Yoyler û Zeynelabidîn Zinar û yên din de wekî “taqê” derbas dibe.*
- (14) *Seydayê Herşenî di destnivîsa xwe de ev ê çarînê bi vî rengî nivisandiye:*
- Di vê tavê divê xanê me ‘iysû ey menê kanê
Kesê dest dit ji dewranê nehalik vê gulistanê
Der axûşeş çih mîared ki ez dil canêş pisyared
Ceres firyadê mî dared ki ber bendîdeh mehmilha*
- *Seydayê Herşenî di dewsa ‘eyşû de ‘iysû, di dewsa “ê minê” de “ey menê”, di dewsa “nihalek” de “nehalek”, di dewsa “buspared” de “pisyared” nivisandiye. Ev cudahî hêjayê lêhûrbûnê ne ku mirov li çavkanî û destnivîsên din yên ku hene jî peyda bike û bide ber hev. Her wiha dibe ku ji destnivîsê xal û xêz jê çûbin jî...*
- (15) *Di çapa Feqe Muhemmed Nûrî ya Misirê û ya Zivingî de peyva “pîrê” bi kîteya vekirî hatiye qedandin, ango (y)ya tîpên Erebi nehatiye danîn. Lê di destnivîsa Seydayê Herşenî de bi kîteya girtî û (y)ya tîpên Erebi hatiye girêdan. Li gorî me ya Seydayê Herşenî rasttir e. Ji lew re pîvana vê behrê ‘ê’ya dirêj dixwaze.*
- (16) *Seydayê Herşenî di destnivîsa xwe de ev ê çarînê bi vî rengî nivisandiye:*
- Bi Qur’anê bi ayatê eger pîrê xerabatê
Bibêjit secde bin latê muridên wî di bin qatê*

Murîd er bê beser nebwed ji fermanêş bi der nebwed

Ki salik bê xeber nebwed Ji rah û resmê menzilha

- Seyda di dewsa “zi” de “ji” bikaraniye. Li gorî kurdî “ji” ye. Lê ku rêzik bi farisî be ne “ji” “zi” ye. Her wiha di malika ku ji Hafîz hatiye ted(z)mîn kirin de jî “ji” ye. Daçeka “ji” ya Kurdî di farisî de “zi” ye.

⁽¹⁷⁾ Ev peyv di hemû şîrove û destnivîsên ku di destê me de ne wekî “fal” hatiye nivisandin. Lê di ya Zeynelabidîn Zinar de wekî “xal” hatiye nivisandin. Her wiha di destnivîsa Seydayê Herşenî de “salê/i ma” û “falê/i ma” li gorî weznê li dû “lam” “y”ya erebî bi kar aniye. Lê di yên din de “sali ma” û “fali ma” ev jî li weznê nayê. Dibe ku ev wekî qusûrê weznê be û dibe ku çewtî be. Ev xal jî hêjayê lêkolîn û lêhûrbûnê ye.

⁽¹⁸⁾ Seydayê Herşenî di destnivîsa xwe de ev ê çarînê bi awayê ku me li jorê daye nivisandiye. Lê di çapa Seydayê Zivingî, a Mele Ebdusselam û ya Feqe Muhemmed Nûrî de bi vî rengî nivisandiye:

Şevê zulmat û deryayê ji mewcan qet xeber nayê

Şikestî keştiya bayê ‘ucacê wê şefeq dayê

Ji herfan mah û salê ma ne hat der şiklê falê ma

Ku ca danendê halê ma sibikbaranê sahilha

- Seydayê Herşenî “Ji vê zulmat...” nivisandiye, di çapa Seydayê Zivingî û ya Feqe Muhemmed Nûrî de “Şevê zulmat...” nivisandiye. Seydayê Herşenî “‘Ucacê...” nivisandiye, di çapa Seydayê Zivingî û ya Feqe Muhemmed Nûrî de “‘Ecacê...” hatiye nivisandin. Li gorî me ya Seydayê Herşenî rasttir e. Her wiha Seydayê Herşenî “y”ya pevkelandinê bi kar neaniye, “deryaê, naê, baê, daê” nivisandiye. Lê di çapa Seydayê Herşenî û ya Feqe Muhemmed Nûrî de “y”ya pevkelîne hatiye bikaranîn. Me vê rast dît û li gorî bilêvkirina Kurdî divê “y” hebe. Me jî vê yekê di teksta xwe de bi kar anî.

⁽¹⁹⁾ Seydayê Herşenî di destnivîsa xwe de ev ê çarînê bi vî rengî nivisandiye:

Mera-j ewwel çi bir xamî kişand axir bi bednamî

Ji rengê Se’diyû Camî ji şuhret pê hisîn ‘amî

Bi dengê bang û awazê dibêjit nexmehya sazê

Nihan key ma ne dan razê ke zû sazendê mehfîlha

- Me ji bo pîvanê (di dewsa ‘mera ji...” wekî “mera-j...” nivisand) kinkirina kêteyê bikaranî. Ji bo pîvanê divê ku ev bi vî rengî bê nivisandin û bê gotin.

⁽²⁰⁾ Mela di vê çarînê de di rêzika pêşîn de mexlesa xwe wekî “MELA” bi kar tine û ji aliyê naverokê ve jî encam û têgihiştina herî jor diderbirîne. Her du rêzikên dawî yek jê ya wî ye û bi Erebi ye ya dawîn jî ted(z)mîna Hafîz e ew jî bi erebî ye.

⁽²¹⁾ Bnr: Dîwan, Melayê Cizîrî, Firat Yayinlari (Wergeranina Tîpên Latini, Zeynelabidîn Zinar) Rp: 12

⁽²²⁾ Bnr: Şîroveya Dîwana Melayê Cizîrî, Celalettin Yoyler, Enstîtuya Kurdî ya Stenbolê, Avrêl 2006, Rp: 16

⁽²³⁾ Bnr: Şeyxul Cezerî, Nehcuhu ve ‘Eqîdetuhu Min Xilal Dîwanihi El-Şi’rî, Nayif Mikail Tahir, Weşanên Spîrêz, 2005 Dihok